

Потщахся убо дому божию, святѣй церкви восточнѣй, яко едему мысленному, раю духовному, вертограду небесному, присовокупити сей мой вертъ многоцвѣтный во славу, всяческих содѣтеля и во ползу душевную всѣхъ благочестно жити тщащихся, непрелестну имѣя надежду, яко всякъ хотяи душевнаго услаждения и ея здравия желаяи извѣстнаго доволны себѣ обрящеть здѣ цвѣты во ползу. Иже убо удобнѣйшаго ради обрѣтения не яко трава, на поли не хитростию художника искуснаго, но естествомъ изводимая, смѣшенно раждается и не скоро ищущимъ обрѣтаема бываетъ, насадишася, но яко же есть обычай цвѣт-вертникомъ искуснымъ всяческихъ цвѣтовъ и зелий, роды же и виды благочинно по сподом и лехамъ сѣяти и садити, — тако и во моемъ семъ вертѣ многоцвѣтномъ художественнѣ и по благочинию вся устроишася, ибо по алфавитному славенскаго диалекта сочинению. Елико убо обрящещи, благочестивый читателю, писмень здѣ начинателныхъ, именованьемъ вещей обрѣтаемыхъ, толико нещуй сподѣ или лѣхъ быти верта сего. А елико вещей измѣнныхъ, толико родовъ на нихъ сѣянныхъ или саженныхъ да разумѣши. Еще колико вещей отъ части измѣняемыхъ узриши, толико видовъ цвѣтовыхъ да имѣши. На послѣдокъ елико статей числа надзнаменанныхъ усмотриши единыя вещи, толико числъ единовидныхъ цвѣтъ да числиши или различие родовъ цвѣтовъ сихъ духовныхъ сице да сочтеши: инъ родъ суть подобия, инъ родъ образы, инъ присловія, инъ толкованія, инъ епитафія, инъ образы подписанія, инъ повѣсти, инъ лѣтописная, инъ молитвы, инъ увѣщанія, инъ обличенія. И тако о прочихъ да умствуеши. Вся же сия имуть силу, здравыхъ душъ веселиемъ исполнения, въ здравии утверждение и отъ недуговъ предсоблюдения. Къ тому и украшенія богу любезнаго и челоувѣкомъ. Болезнующихъ же грѣховными недуги душеврачеванія, прилѣжно чтущимъ я и во умѣ си, яко во изящнѣйшей силѣ душевнѣй, часто разсуждающимъ и во сокровище памяти, яко въ хранилище души, во соблюдение дающимъ. Обрящеть здѣ юный укротительная стремленийъ страстей си и угасительная пламеней ярости и похоти, отемляющая нещевание о многолѣтствіи, показующая прелести сего мира и отъ бога удаляющая. Обрящеть старый утверждающая немощь его ко подвигомъ духовнымъ и наставляющая ко памяти краткости вѣка и поминанію близъ сущія смерти и прочихъ послѣднихъ. Обрящеть здѣ благородный и богатый врачевства недугомъ своимъ: гордости смирение, сребролюбію благорасточение, скупости подаяніе, велехвалству смиренномудріе. Обрящеть худородный и нищій своимъ недугомъ цѣлебная: роптанію терпѣніе, татѣ трудолюбіе, зависти тѣнныхъ презрѣніе. Обрящеть неправду творящійъ врачевное недугу си быліе: правды творение; гнѣвливецъ — кротость и прощенье удобное; лѣнivecъ — бодрость; глупецъ — мудрость; невѣжда — разумъ; усумлящійся въ вѣрѣ — утверждение; отчаянникъ — надежду; ненавистникъ — любовь; продерзивый — страхъ; сквернословецъ — языка обузданіе; блудникъ — чистоту и плоти умерщвление; пьяница — воздержание. И всякими инѣми недуги одержимии обрящуть по своей нуждѣ полезная